

四庫全書

史部

欽定四庫全書

史部

平定兩金川方略卷九十五至九十七

員外郎_臣顧宗泰覆勘

總校官原任侍講_臣王燕緒

欽定四庫全書

平定兩金川方略卷九十五

四月甲辰明晃富德奏言竊河南北各處前敵以
及駱駝溝富噶爾拉兩路均為雪阻難以輕進臣
等悉心斟酌查正地一路若能乘勢直搗中間則
已潰其腹心而四面交攻賊人必成瓦解之勢該
道路情形其由單布什咱之甲魯至黃草坪即與
駱駝溝來路相通向北統行則與康額特山勢相

連其下即為馬爾邦一帶寨落向前直進即為正
地若并攻獨松得臨河口則噶拉依在其東勒烏
圍在其西被兵我從中拆截投之所向無不皆宜
現據土都司丹津扎布稟稱情願再行搜集土兵
一千為此路協勦之計臣查自布拉克底巴旺以
至甲魯由甲魯一路進取兵動糧運應即先為核
筭而計大營所存兵數此時又暫為抽撤而於前
敵防守不可不嚴且正地一時得手即以並力夾

攻亦難多為派去其中可以抽調若干如有不足
擬在德爾格特等部落分調土兵應用如以漢兵
數千合為一軍其應調土兵亦須量其遠近摠以
發兵之日各土兵俱陸續而來於窰入機宜更為
有濟至將來調用本地各土司番衆亦止令揚人
仍在當噶爾拉進攻庶使賊人四處察聽亦無從
測其端倪

同日富勒渾奏言伏查大板昭一帶實為西北二

軍後路而梭洛柏古薩拉等處均關緊要已經將
軍阿桂派撥官兵分布防守梭洛柏古安兵四百
餘名黃草坪安兵三百名大板昭當噶爾拉派內
安兵二百五十名大板昭護守糧臺安兵二百名
薩拉安兵四百五十名自本年正月安設以來迄
今三月各卡隘防守嚴緊尚屬安靜茲奉

諭旨訓誡臣復嚴飾各處防駐將弁等各就駐防處所
每日各帶官兵嚴以搜查俾賊匪無從藏匿臣仍

來梭洛柏古一帶督率稽查搜勦以免疏虞且賊情狡詐目下大兵進搗賊巢或力竭勢窮四散逃逸於深林僻徑之中零星穴出滋擾更不可不預為防範臣惟有嚴督府弁晝則繞山搜嶺夜則分撥巡防使賊番既不能滋擾並可借此殄絕根株同日桂林奏言前據臬司李世傑稟有蘆山縣背夫行至附近僧格爾之日古嚕溝地方賊匪突出劫去軍米六石五斗臣正在籌辦間復以該臬司

面稟據僧格宗糧員稟稱由默資溝護送軍米一百十四斛行至將近日古嚕沅會消之處坡上擁下夾壩搶去米九十七斛等語查科多至僧格宗相距雖僅三十餘里其中深箐僻途賊匪易於出沒該處糧運日增紛擾莫若將科多與僧克宗分作二處運供不必由默資溝等處行走賊人自無從覬覦其僧格宗等處駐守官兵所需糧石軍餉俱改由南路章谷案月運交附近僧格宗之日古

魯以令其就近赴僧格宗支領其南路又駐科多
默資溝內處官兵每月僅需米五十餘石為數夫
幾即就近歸併美諾支領均奏入

上諭軍機大臣曰明亮等奏擬由正地進攻所籌亦是
通計各路情形惟阿桂一路可望易於得手曾已諭
令阿桂如得遜克爾宗或徑抵勒烏圍即應將新派
之滇黔兵五千全行調往應用設尚未能即進又不
宜徒為株守之計自應酌撥二三千邁往南路令明

亮率領逕赴正地攻其無備明亮等仍應以照前旨
密咨阿桂妥商而行但明亮移兵另攻正地之時至
於富德奏言河北一帶仍照前攻打使賊人不能窺
見端倪預作準備方為妥善又據富勒渾奏大板昭
隆拉拔洛柏古等處俱派官兵防守是富勒渾於軍
營後路防範頗為留心令官軍日漸攻進更宜倍加
嚴密實力周防斷不可稍涉大意又桂林奏科多至
僧格宗相距離僅三十餘里其間深箐僻途賊匪易

於出沒莫若將富勒渾所需糧石改由南路章谷通
交其餘附近僧格宗等處者即近就在曾格宗及歸
併美諾等處支領使米石不由僻處經行可杜賊人
窺伺等語所見甚與朕曉諭相合自應如此辦理至
所奏由默資溝運送兵米行至將近日古魯忽被夾
填搶去米九十餘斛等語現據桂林奏此後糧運不
再行默資溝等處自可無後患但此次夾填搶去米
石較多尤不可不上緊嚴緝昨已賞給汪騰龍叅將

銜仍令在僧格宗辦事併派桂林往來照管且此時現有教成在彼正當及早搜擒賊匪毋任漏網

同日富勒渾郝碩奏言前准署督臣文綬酌定夫數自汶川以至薩拉每站安夫六百名大板昭至谷噶每站安夫八百名又西路自草坡至馬爾當每站安夫一百名並聲明其中有應增應減之處令臣等在外核定臣等通盤核計查薩拉大板昭黃草坪梭洛栢古谷噶拉穆登古共計七站自梭

洛栢古以外路徑偏窄山勢陡險多有不能按站
臺之處且在金川境內必須審度情形以就各卡
安設方為妥協雖經定為一站而計其道里又有
站半應仍以站半報銷通以辦理統計大營西北
兩路兵數及夫役口糧每日約需米四百餘石自
汶川至薩拉各站米石本係長運兼行除揪砥一
站供運西北兩路軍糧該站應安夫八百名外其
餘各站只須安夫六百名足數應用惟商米俱係

長運大板昭交收而大板昭以前各站均伏滾運之米計每日即以四百石為率已需用夫八百名加以軍火軍機雜差等項每站應安夫一千名庶足資輓運如有不敷再行就近以用再自薩拉至登古各站在在與賊境相通應於每站原定額夫之內各揀選精壯民夫一百名各備器械以守糧臺並協同兵丁支更巡邏益徵嚴密其瑪爾以至明郭宗各站所在軍機軍火趕運完竣並經裁尺

至自明郭宗至瑪爾當八站內布郎郭宗一路為
提臣常青駐扎之處尚須分送各處防兵口糧應
酌留站官一員長夫二百名令其移駐營盤之內
運米時多派官兵沿途護送以保無虞其餘七站
原定安夫一百名均可不用又美諾為提臣王進
奉駐扎之所既須分運各防兵口食並轉運僧格
宗軍糧該處亦應酌留站官一員長夫二百名其
自大邑坪至美諾各站每站舊設夫一百名應即

將二站并一站可省出二百名派站委官一員兼管足資接續輓運再如大兵攻克勒烏圍尚須於登古之外酌量添站業經備有人夫即可隨時安設若再直抵噶拉布賊巢核計程途又須加增三四站現在後路裁撤及北路裁撤之夫分安附近各站趕運楸砥運到之糧一經大兵乘朋長駐就近抽安一律齊備無庸內地動須加派之煩目下楸砥糧運暢行長運短運每日約有千餘斛即使

三路官兵合路足供支發而所餘馬匹留養大板
昭將來添設馬臺亦無庸另行調撥奏入
上嘉之

丙午

上諭內閣曰陝西定邊協副將索明著賞銀一百兩馳
驛又往阿桂軍營以領綠營兵丁進勦

庚戌阿桂豐昇額色布騰巴爾珠爾奏言竊查正
地一路可進兵以搗賊匪明亮等擬將新調滇黔

官兵酌量撥給以資攻取茲十一日革布什咱土舍丹怎扎克巴差頭人根闡勒等來營稟稱正地本係革布什咱之地舊時百姓五十餘戶並未遷移該處不過金川小頭人數人在彼監守現在甲魯有革布什咱兵三百名又有孔撤麻書土兵若令此項土兵突然前往可以招降不然亦能力取而由正地前至獨松攻取亦易為力等語查正地進兵之處臣奉到調撥滇黔官兵

諭旨即已密札明亮等商辦嗣又奉

旨垂詢正地是否可以進兵情形從將覆奏摺稿行知
明亮妥籌速覆今正在籌畫間而革布什咱土舍
適又遣人前來備陳進取事宜懇請官兵接應事
機頗為湊合臣又於十一日飛札明亮等迅速辦
理奏入報

聞

同日阿桂豐昇額色布騰巴爾珠爾又奏言查雜

谷三土司向來行事均屬相同獨於結照一事前
從噶克未經懇請臣等是時揣番情益因噶爾璫
魯木宗陡柔等處原係雜谷之地前因土司蒼旺
治罪策楞岳鍾琪已將噶爾璫魯木宗賞給綽斯
甲布陡柔賞給丹墀乃金川賊酋又唆使從噶克
搶站在該土司亦明知私行佔據於理非宜現又
向夫出力之處若懇給還此地自似難於措詞是
以未敢遽請茲從噶克土司納木嘉動令其所用

大頭人安本來稱令土司派兵攻打金川摠是真
心出力求將從噶克舊管之噶爾璦魯木宗陡柔
百姓賞給土司並給一張明白執照等語臣等語
以此三處地方既經分給綽斯甲布丹堪即當遵
奉法令不得私相爭奪况爾土司雖派兵助勦而
綽斯甲布土司亦屬實心出力若遽賞爾管理執
照何以服彼兩土司之心摠俟將來看爾等出力
如何再行辦理據安本面稱將軍吩咐實以公正

不敢復置一詞經臣等如此曉諭伊等自揣助兵
攻勦稍有不和綽斯甲布之處即不復能邀

恩賞則督令伊土兵攻打必倍易為力奏入

上嘉之

壬子明亮富德奏言查由正地一路進兵該處途
長道險戈守兼資必需兵萬餘始足敷一路之用
現計大營可酌抽兵三四千吉地各卡抽派四五
百名合以新到滇黔兵二三千約可得六千餘人

其德爾格忒一帶土兵自應添調四千以壯軍威
但兵行糧隨相資並濟今准桂林札稱若由正地
進攻又須安站添夫趕運米石恐一時不能猝辦
須得現任總督親身查催呼應方靈等語查南路
站遠途荒內地運供向來不能迅速此時新添一
路官兵即便加一路糧運自應聽其辦理稍有就
緒始免貽誤奏入

上諭軍機大臣曰正地一路原係偏師襲取之策但距

明亮軍營迂遠兵行本不便捷若俟糧運既已就緒再行進兵則賊衆聞之得以預作準備殊為非計且此路進兵並非正局其得與不得皆無甚關係豈可大費兵力多至萬餘并欲調滇黔之兵二三千備用尤為未協此次各路進兵自以阿桂處最為可望正宜添助兵數使其聲勢愈盛成功更宜迅速不宜轉分減其功力况阿桂處聚兵既多其進攻勒烏圍時或見他處有可分進之機及資夾攻之利者可因時

遣派前往較為便捷自應將滇黔所調之兵全數令赴阿桂軍營方為妥協現已傳諭文綬令其於滇黔兵到省時即令統兵大員帶領遄赴西路備用明亮等一路現在雖無機會可進計阿桂攻至勒烏圍時賊衆心必惶悚各處守禦未必能如從前周到明亮惟當留心探聽攻取亦未可定此時馬爾邦一帶軍營賊於人相慮甚關緊要若將現兵移撤過多明亮又復親自前往萬一賊衆得知如此信潛出抄截官

兵後路更屬不成事體明亮竟毋庸親赴正地又當
傳諭革布什咱土舍等以爾等如果誠心恭順思欲
進攻金川即該照綽斯甲布之例自行派兵前往攻
取或欲求官兵相協不妨於霍耳德爾格忒等處人
派兵數千同往亦足壯其聲勢明亮等處於營內酌
選兵一二千揀選勇幹可恃之領隊大員令其統率
前往以資接濟則需兵不多糧運不致妄費且於西
南兩路自為妥協方合籌辦機宜

臣等謹按正地一路地本荒僻今明亮以庚額特既經賊人死守而查斯第博昔又復險隕難攻不得不改圖進取是專就南路計畫未能籌及全軍我皇上坐照如神即以正地下非正局且恐分減兵力因令明亮無庸親往而以新調滇黔勁旅并歸西路厥後犁庭掃穴果得西路之益而明亮一路究因路遠山深難以窺入兵形聚米萬里之外早已燭照計及矣同日明亮富德又奏言查吉林黑龍江官兵帶人

跟役餘丁打伏處所與官兵一併出力可否作為
兵丁一同辦理奏入

上諭內閣曰吉林墨龍江餘丁既皆與官兵一同行走
著照所請照兵丁例一帶辦理并行令各路等軍以
有甲缺即行坐圻其各軍營隊內有似此者查明一
體辦理

五月甲寅

上諭軍機大臣曰此時正地一路既不需多用兵丁其

糧餉即可無庸多辦且阿桂現在進兵其西路一帶
需人辦事之處較多劉秉恬不必前往南路辦理仍
留西路將應辦之事酌量妥辦至正地用兵無幾需
糧有限李本現駐吉地況有桂林為之統率足資經
理約計正地一路不過土兵三四千綠營兵二千只
須核此兵數應用之糧若干陸續籌運即可接濟著
傳諭桂林即就近飭知李本妥為籌辦勿致貽誤

丁巳王進泰奏言據駐守帛噶爾角克碉副將溫

有哲稟稱本月十九日夜有賊番百十餘人從山
梁直撲營卡各兵用排鎗戈竿極力打射連撲三
次俱皆打退又稱巴木通有賊百十餘人從左右
梁衝下直搶營盤連撲三次俱被連環鎗打退賊
復往扎山卡斷絕水道驍騎校雙喜同千總張可
雲等帶兵衝擊賊衆潰逃水道始通等語臣復差
派幹弁前往併力追擒務盡勦滅

同日富勒渾奏言美諾糧員張世祿稟稱本月初

九日糧夫運米五十斛行至日古嚕溝遇見夾埧
將遺米三十三斛等語查日古嚕溝為科多赴僧
格宗必由之地以有賊番出沒自應及早變通以
免賊擾茲據桂林咨寄摺稿內稱僧格宗等處防
兵糧石改由南路章谷逐月運交所有日古嚕溝
今其就近赴僧格宗支領其南路撥駐資哩等處兵
丁仍就近歸併美諾等語自為妥當即分飭總理
司道等查照辦理均奏入

上諭軍機大臣曰據王進泰富勒渾等奏夾坝滋擾以
形賊番當此窘迫之時向敢潛出劫奪實為可惡前
此尚疑夾坝之事或係小金川乏倉窮番所為今觀
此等出沒情形自與小金川番人無涉必係逆酋縱
令出外乘間滋擾且從前擒獲賊番供詞功噶爾拉
大頭人莫撒斯等派賊番往僧格宗一帶偷放夾坝
此等賊人實堪切齒俟平定金川之後務專派勝兵
數千將各處夾坝賊匪盡行勦洗勿使稍留餘盡以

填賊與前此準噶爾瑪哈心相似即將來辦理善後
事宜亦必將此盡去根株不可畧存姑息況此等賊
匪現在尚敢屢次擾竊其罪無可逭非若金川賊番
之窮蹙來役者尚可宥其一死籍以招降切不可稍
有游移輕縱至賊番現放夾填之處俱令吃虧而去
尚係近日兵丁稍知奮勉不似從前之怯懦無能但
所稱每次見賊數百餘人來營大肆搶劫殊不可信
若使果如所言有如許賊衆綠營兵丁安能與之相

拒乎搃之賊番一有滋擾必須痛加殲刈俾知懲創而阿桂軍營後路如大板昭等處尤關要不可不切為嚴防其自僧格宗至美諾一帶已非糧運所經則賊者無可希冀向後夾埧諒應漸少其係各白卡惟在富勒渾旺保祿常青桂林等勤肩官兵寔力防守遇有賊至務須盡力痛殲勿稍疏懈

戊午

上諭軍機大臣曰前將新調滇黔兵五千緊令速赴阿

桂軍營應用令據文綬奏頭起黔兵五百名已經由
省起程以赴南路章谷一帶聽副將軍明亮等調用
等語此項黔兵既赴章谷若令仍回成都改赴西路
未免迂遠因閱糧運程站圖自章谷由美內至阿桂
軍營僅二十四站兵丁即從此路行走較為便捷且
此常有夾坝出入令得如許官兵陸續以進於事甚
為有益或途中遇有夾坝隨時殲勦亦甚便易着令
諭文綬即速妥協辦理

已未

上諭內閣曰川省軍營銀兩節經由部撥發及各省協撥捐解者通計三千四百餘萬據文綬奏報月勿存庫銀數尚屬寬餘但籌辦運等項應行先事以辦者多自須寬裕儲備即現在進勦金川將次蕩平而善後事宜亦當務為籌計著戶部再於各省存留協人銀內動撥銀五百萬兩令各該督撫派委妥員陸續解川存貯備用

同日阿桂豐昇額色布騰巴爾珠爾奏言據總兵五福稟稱十一日丹墀土舍挑派土兵由作因項又赴德烏當噶搶護賊番牛隻又於十六日復挑土兵一百名同官兵前赴穆爾津岡下播坵地方千夜搶殺賊番出碉對敵經丹墀頭人殺賊二名當即分別獎賞以勵後事等內查丹墀漢土官兵本屬無多但如此相機搶殺亦可稍分賊勢現在飭令該鎮仍不時派兵掩襲奏入報

聞

平定兩金川方略卷九十五

欽定四庫全書

平定兩金川方略卷九十六

五月辛酉

上諭內閣曰此次續調進勦金川之雲南兵三千貴州兵二千據該督撫等奏報行走甚為迅速現俱陸續抵川前赴軍營聽用該兵丁等踴躍遠行深為可嘉著加恩賞給一月錢糧以示鼓勵

同日舒常奏言四月十九日未刻遙聞泥峙岡鎗

聲甚緊想係賊人乘霧滋擾臣即派侍衛進財保等帶兵前往接應旋據都司張士儒稟稱官兵赴南溝取水有賊八九十人分為三股突出都司分隊抵禦攪殺一處斃賊四五名餘始奔竄等語臣伏思泥峙岡地屬孤懸是以賊番屢來窺伺不可不嚴加防守乘機殲戮即日撥宜喜官兵一百名添駐以資防勦奏入

上嘉之

同日明亮富德奏言現在建寧鎮總兵依常阿在營病故其陝西兵丁飭令寧夏鎮總兵劉輝祖管理奏入報

聞

同日五岱奏言軍營陸續所出護軍校等缺揀選應陞人員請

旨補放奏入

上諭軍機大臣曰軍營所出之缺固當揀員請補但參

贊俱係協同將軍辦事之人凡事自應會同商酌斷無自專之理今舒常在宜喜軍營去將軍豐昇額甚遠遇有缺出若必商之豐昇額始行補放員缺必至久懸於事未免無益若五岱離將軍並不甚遠一應缺出自應與豐昇額商定再行辦理如打仗奮勇殺賊受傷當立加獎勵者隨時奏聞施恩尚屬可行其餘軍營尋常所出員缺亦何不可待耶五岱所辦非是着傳諭將軍阿桂等嗣後參贊大臣所領隊內缺

出如參贊去將軍甚遠或有打仗奮勇者即一獎賞
人員准參贊自行辦理其去將軍不遠及尋常所出
員缺務與將軍商定公同會銜具奏勿得仍自擅專
甲子顏布深奏言查綽斯甲布地方處以與賊境
相通而糧運最關緊要當逆酋窮蹙之時或恐挺
而走險自宜加慎重前奉

諭旨令習練夫役持械防護臣即加意辦理令各夫與
護糧兵丁操演日久其中頗有勇幹之人並令各

糧員自備鎗刀等物俱已齊備現在糧運俱令壯夫護送結隊而行使賊人無從窺伺再緋斯甲布後路一帶官兵逐日勤操漸為加熟及次宜喜進攻該兵等多肯奮勇曾又派二百名前往打仗現在該土司感激

天恩必當再舉嗣後一遇大營進攻仍該酌選精銳前往聽候參贊舒常調遣且往返尚易於防守亦不致有疏虞奏入

上諭軍機大臣曰顏布深奏所辦甚好糧夫如果能演習技勇自能兼資防護着鄂保富勒渾等實力行之又據奏綽斯甲布後路官兵能如此踴躍自屬極好着舒常留心酌量若此等防兵於征勦實為得濟而於防守亦不至相妨自可聽其奮勉自効中有勇往出衆者仍當量予獎賞設或防守汎地之中不便輕為調取雖伊等奮勉懇請不便曲從舒常當妥為籌

辦

戊辰阿桂奏言接准明亮等扎稱荊州滿兵於一
應戰守處所俱不得力等語查各省駐防滿兵雖
不似京營滿州究非綠營可比今荊州滿兵戰守
俱不得力甚屬廢弛查成都駐防滿兵前因不甚
奮勉曾經奉

旨將伊等應得之項照綠營一體給與以示懲儆令荊
州滿兵亦應請

旨將應得之項照綠營兵給與若能自此漸知愧悔再

行奏請加

恩至荊州將軍綽和諾副都統舒明阿平素既踈於訓練而臨時又不能示以勸懲以致軍威不振應着交部嚴加察議奏入

上諭內閣曰荊州滿洲兵前用赴川時徒步前往情愿不用馬匹朕深嘉憫曾賞一月錢糧以示鼓勵伊等理應感激朕恩諸事奮勉乃戰守俱不得力殊失滿洲舊習著照阿桂所奏將伊等應得之項照綠營兵

給與以示炯戒綽和諾舒明阿乃該管大臣又現在
領兵行走所管兵丁一至於此着交部嚴加察議旋
經部議革職得

旨綽和諾舒明阿俱着革職不必開缺仍留軍中効力

同日阿桂豐昇額色布騰巴爾珠爾奏言臣等查

日爾巴當噶即係日爾巴碉該處在凱立葉一道

山梁之中官兵若能佔住即可斷截賊番上下來

往其地實為險要臣等前此屢次陳奏酌擬派兵

從凱立葉山腿斜上約會凱立葉官兵由後夾攻者即係此處並經繪入圖內嗣臣等使人詳悉踴看並與海軍察等公同酌議以其地在山陰箐林深密崖礪陡險兼之彼此隔遠雪霧時作萬一不能如約夾攻即不免有失利之處故得斯東碉寨以此雖經搶掠焚燒而日爾巴碉尚難期於必得是以未及辦理且官兵已定繞習喇穆喇穆後路一經佔據山梁則喇穆喇穆之賊既可反攻自潰

而格魯瓦各人寨皆歸掌握從此進攻勒烏圍不
惟得勢而且捷近所有日爾巴碉亦可無難籌辦奏
入報

間

同日阿桂奏言汪騰龍於二十九日回至章谷臣
將搜山勦捕事宜與之商酌查明軍營現有擬改
途進取兵力固屬難辦而窮番鼠竊自應設法搜
絕其根株方可肅清後路臣現於約咱等處駐守

之官兵內酌量抽發漢土兵五百名恐該處山勢
陡險兵力尚覺稍單復於章谷留防兵內擇其壯
健者抽調一百名交汪騰龍帶領星夜前往併行
知總兵教成會同盡力搜查凡遇可以藏奸之處
即行焚燬使之無地可容并可乘其驚駭極力殲
除並令汪騰龍等如拏活口究出夥黨即密赴窩
藏所速行掩殺不使稍留餘孽且查此等窮番日
前搶去糧石勢必以為有利可圖未肯遽散而散

亦必分貯於所伏之區令出其不意深入僻隅無
不搜捕徧及不獨賊無處藏身莫能施其技倆並
可將糧石取回庶後路漸漸可就救寧必不至日
增滋蔓此番搜查酌計至初十日便可辦竣臣仍
親赴該處一帶將一切情形細加查看另行據實
奏入報

聞

同日

上諭內閣曰成果患病甚重暫時未有全愈即着回京
福興腿疾既已較前痊愈即令其協同常青辦事大
愈後再赴大營

辛未明亮富德奏言臣等查章谷一處山迴路轉
非賊苗瞭望之所及先於數日挑派兵官五百餘
名逐段埋伏預將馬匹散放沿山以為設誘之計
初三日辰刻果有賊二百餘人自了口而下突來
搶奪經扎爾桑會集各卡兵丁上前迎擊賊苗一

面放鎗抵禦一面搶馬奔回當時伏兵齊起賊人
腹背受敵被箭中鎗紛紛四散散後有數十餘人
前來救應望見我兵勢盛不敢交鋒旋即潰去計
此次殺死賊酋共二十餘人

同日明亮富德又奏言現將抽赴正地各項兵五
千餘人及領兵各員密為派就其新調頭起點兵
亦已積踵而來約計此月二十前後似可全抵章
谷至草布什咱願幫土兵一千已據土都司丹津

札布稟和皆已齊集專候調兵但查丹津札布平日於本管百姓短於駕馭又各番意見不免參差臣等恐風聲不密已札令副將鄭國卿會同李本將甲魯一帶可通賊境卡隘務加意巡邏以防透漏消息至此次進攻路數既多而賊力有限無論其有無準備總當鼓勵將士為一舉以克之勢同日明亮富德又奏言接奉賞賚斯第胡土克圖哈達銀兩器物及示諭喇嘛噶爾瑪噶什等

諭旨臣等隨即遵

旨頒賞曉示該喇嘛等無不感激奮興以期誠心圖報又據稟懇賞給禁止騷擾廟宇印文並求奏請賞給廟名印信以更易於率屬尊以王教等語查噶爾瑪噶什係番地大喇嘛念經以來又尚無甚効驗而查其情形頗具肫誠適據由金川逃出之番人供稱十數日前聞金川嘉覺地方被雷轟死十七人現在賊衆皆病瘟疫死者甚多又雨電大傷禾

稼金川人皆言係西賊喇嘛念經詛咒之故心生畏懼等語是賊匪惡貫已滿所以

上天屢示災殃而喇嘛等誠心念經亦不為無益均奏入上諭軍機大臣曰明亮等奏於穆谷務為設伏散放馬匹誘賊使來殺死二十餘人等語所辦甚好惜殺賊僅十分之一未能痛加殲戮較之株守不動自為差勝耳至正地進攻之局現據革布什咱喇嘛供詞有聞得金川遣人往正地修卡被雷打死之語而昨月

阿桂所奏脫去小金川番人阿璫以供詞有官兵若從正地由角山進攻賊人即當不起之語據明亮又稱黔兵於五月二十全抵章谷再行六日方至甲魯而自甲魯至正地又不知尚需多日約計六月初方得進攻恐時日太多賊碣無解可擊仍屬徒勞無用且賊中明言恐官兵從此攻打或係暗為防拒故以此語示弱誘我以計不可不防況明亮等於大兵中抽往正地之兵五千餘人又新調黔兵二千革布什咱

土兵一千及德爾格特霍爾等人所調土兵通亦不下萬餘分隊行走斷不能使賊人竟不聞見況又脫出之喇嘛供稱索諾木派人在革布什咱各山梁上遠遠探聽官兵消息等語是官兵一動賊易得知即如喇嘛在南路念經賊衆知其詳且以明亮稱革布什咱土都司丹津札布平日不能駕馭本管百姓恐風聲不密易於洩漏預飭副將鄭國卿等於甲魯一帶加緊巡防等語行軍旁飭之道原亦只能如此又

以供索諾木任用革布什咱之庸中旺加勒海次令其帶兵此必從白勾引金川戕害舊土都司之人故爾倚為心腹現在明亮等河北河南軍營由布拉克底已旺出入該土司等及為恭順可保無他是甲魯一路雖未免即得不致有意外之虞今正地一路雖與賊布穴相遠却為賊苗易於伺探預防朕因此甚不放心明亮統兵進勦務須加意慎重摺內所云無論其有無准備總以鼓勵將士為一舉以克之語但

知輕率一往而不知籌度萬全設或稍有閃挫各路官兵必皆聞而氣餒所關甚重其為國家軍務計固不宜如此掉以輕心即明亮自為計亦豈可但知直前不顧着諭明亮總宜熟籌妥辦必須實見有可乘之機其事大有把握方可進兵若稍涉疑似惟當慎之又慎軍營後路一進革布什咱之境處處尤須留意照料明亮宜勉力妥為之仍將辦理情形若何詳悉具奏

臣等謹案正地之難以進攻前荷

聖明詳晰剖示以途徑既迂轉餉又復需時恐賊叢知情早備諭令明亮毋庸親往萬里軍形如指諸掌茲復

申戒再三且因明亮奏稱不論有無準備惟當一舉而克慮其輕率一往不計萬全關係甚大

天語丁寧

謀深慮遠俾得集事奏功而諸臣承

命行間恪遵

宸斷亦蒙福而身名俱泰也

同日舒常奏言四川疊溪營兵丁鄧有德去年自金川脫出供係被賊掠去嗣隸兵部咨查陣亡兵丁事蹟開有鄧有德之名查據副將李天佑又稱係瀘寧營把總游宗義從前具報錯悞請將游宗義斥革以報之李天佑嚴加議處奏入

上諭軍機大臣曰舒常奏把總游宗義上年將金川擄去之兵丁鄧有德捏報陣亡已降旨將轉報之李天佑交部嚴加議處游宗義斥革發往烏魯木齊効力

贖罪以示懲儆至鄧有德在軍營時或因樵及迷道被掠抑係乘間脫逃被賊擄去其中情偽不同豈可不詳行究詰僅以既經脫回置之不論鄧有德此時若仍在宜嘉軍營著舒常即將從前因何被擄情形嚴訊確供覆奏分別辦理如鄧有德已回疊溪本營即諭富勒渾文綬嚴行查訊具奏其游宗義已於上年七月內因傷重遣回本營並着富勒渾文綬查明即行發遣兵丁被賊擄去該管將弁已難辭失律之

谷乃並不查明輒為捏報陣亡緣營欺誑之習實堪痛恨不可不嚴行懲創着阿桂等將捏報陣亡及現在查明治罪之處通諭各軍營將弁俾知儆戒

壬申文綬奏言黔兵起程前赴南路後以接奉改赴西路

諭旨臣隨即飛扎桂林等酌量情形如黔兵將抵章谷即由該處發夫送至美諾固為妥便如該處難以辦理仍令由打箭爐雅州邛州取道大邑崇嚴直

趨灌縣又赴西路不必再由成都稍為迂捷至滇
兵三千分六起入川自五月初一至初十日已全
數進發此時頭起約已可至揪砥再五六日即可
前至阿桂軍營奏入

上諭軍機大臣曰此項黔兵文綬既令改赴西路於阿
桂軍中聲勢自為更盛以滇兵行程計之應到在黔
兵之前兵力愈多成功自必愈速於事交為有益况
各路進兵可望得手惟阿桂一路為最阿桂所奏及

番賊至後即當晴霽此時距夏至已將十日天氣當已晴定而新兵踵至統以進攻自為有力佇聲和音或阿桂至勒烏圍後酌量宜喜馬以邦至正等處有可夾攻情形即由彼處派兵前往亦屬甚便更可在此時之必需襲取正地也或阿桂間點兵改赴西路之信仍欲遣其赴明亮軍營或明亮進攻正地以有成說而點兵又至章谷即留其在彼應用不復遣赴西路俱無不可但能便捷得利於彼於此原無分別

所謂及其成功一也或明亮已經起程而黔兵又赴西路則明亮即率現在河南北兩營所抽之五千兵及革布什咱之一千兵以往地俱着明亮臨時酌辦但此路進兵較他處尤宜加意慎重昨所降諭旨極為詳晰明亮惟當慎之又慎至阿桂在穆喇穆已經兩月惟盼其即速進攻乃屢為雨雪所阻又為懸念焦切朕亦深知阿桂在軍營與士卒同甘苦身經勞瘁諒必日夜速冀成功得以及早還朝受朕恩眷其

急切自不待言惟以大功將就之時朕盼望甚切不得
不向其催促耳

丁亥阿桂豐昇額色布騰巴爾珠爾奏言竊查谷
噶一路自本月初五日後雨雪大作日夜連綿較
前更甚至令畧無半日之晴臣等焦切愈深而官
兵亦靡不憤急初五日賊於雨霧之中在羅博瓦
山坡添建新礮二座官兵望見均請往拆其礮雖
沉淪甚深然距官兵頭卡僅有里許一鼓作氣尚

可直達當經海蘭察額森特福康安於二更大雨
如注之時密派兵八百名以往直撲碉根毀牆而
入賊番出其不意且見官兵奮迅異常一面放弓
抵禦一面逃走當經官兵殺死數賊餘賊潰逃立
將賊碉拆毀現在官兵無不盼望晴明人人思奮
目今已交夏至此後雨勢稍稀自能奮迅直入而
又有各路合攻則於埽犁之局無難於迅速集事
奏入

上諭軍機大臣曰連日盼望阿桂進兵之信甚切今據
阿桂等奏近日軍營情形尚因雨雪未能深入實為
憤懣而賊人復乘雨霧添建新碉更堪切齒海蘭察
額森特福康安等即於大雨中殲戮數賊拆毀其碉
足以壯我軍之氣而破賊人之胆於軍務甚為有益
福康安正當幼年藉此演習成人於彼亦屬甚好至
計阿桂拜摺次日即交夏至向後雨雪諒必漸希阿
桂自宜相機速進以期迅奏膚功從前曾諭阿桂等

凡遇所過大山務當竭誠禱祀冀山神之默為相佑
利我軍行且以金川用兵情事而論朕寔本無欲辦
之心乃逆酋索諾木等敢於負恩反噬罪惡貫盈又
有不得不辦之勢並非朕黷武窮兵是曲在賊而直
在我應邀

上
天照鑒自必嘉佑官軍而潛禱逆賊之魄至所在山神
代

天司化亦當助順鋤逆上體

穹蒼心若非雨雪因賊孔達所為豈有正神以聽賊人驅使為此背理妄行之事況將軍等既已虔禱而不應即屬邪氣從來邪不勝正或於雨雪來處用大礮迎擊如韓愈之驅鱷魚亦屬正理着阿桂斟酌行之

壬辰阿桂豐昇額色布騰巴爾珠爾奏言又查臣等前此籌度繞截喇穆喇穆賊人後路久經部署妥協特因崖險泥深未能攻撲深為焦悶自應設法殲戮賊人以舒忿恨且乘此雨勢昏暗突然攻

打或可出其不意搶佔碉卡而喇穆喇穆了口大
碉又與羅博瓦官兵營盤相近可以一鼓直往已
於十三日夜雨勢稍停分撥官兵於亥時進攻至
十四日丑刻雨雪大作海革察同將弁等領兵不
避雨雪直向喇穆喇穆高峯大碉鼓勇行上連奪
碉下石卡三座殺賊十餘名餘皆負傷帶箭竄入
大碉圍攻三次直至碉根拋擲火彈及用千餘兵
圻其碉上鎗眼石塊究因雨濕火彈不能焚燒攻

至已刻賊番併力死守將兵漸次撤回其額森特
福康安等領兵由喇穆喇穆了口木城背後登赴
以進連奪石卡二座斃賊數名而正碕因雨後巖
礪泥滑未能克取其普爾等領兵進抵碕根與海
蘭察等合力攻打賊人出碕抗拒殺死十餘名被
傷逃遁者亦復不少至烏什哈達明亮等領兵進
攻羅博瓦山岡下木城石碕當有賊番百餘從箐
內冲出迎敵侍衛額爾登保即行領兵衝擊復見

山坳內一隊賊人欲赴喇穆喇穆山梁放火烏什
哈達等又率同額爾登保副將豐盛阿迅往習擊
鎗箭齊施賊番受傷亦多擊敗遁回其保寧彰人
等亦先領兵預備一聞喇穆喇穆山梁聲響知官
兵業已進攻又於喇穆喇穆山梁之左斜山攻撲
山中各碉以搗其虛又令成德特成額等領兵從
薩斯嘉大溝攻賊木城成德等一面派兵將高班
琰等埋伏接應一面派都司鄭起榮等領土兵進

攻各土兵等冲進木城砍殺賊衆過半正在併力
砍殺而其上面礮內賊衆蜂擁救援我兵復出木
城搶上側旁奮力擊賊即敗回礮內抵死拒守各
隊以次撤回查此次進攻實以相持日久各兵鬱
悶已極故於奪卡撲礮無不人思自勵究因泥滑
未乾又逢大雨以致雖有殺戮不能即日克取究
屬臣等過急之咎但喇穆喇穆山形又險究不如
羅博瓦之高峻一俟晴霽必不能久阻我兵臣等

現於羅博瓦山岡下添築木城礮臺將大礮運往
以上臨下對準賊人木城石礮儘力轟擊若該處
之礮一有坍塌毀之形固可隨機以佔而賊人見我
着意於遜克爾宗一帶或於喇穆喇穆防禦稍疏
於下次攻取亦為有益但思該處林箐深密官兵
砍伐木枝賊必佯來滋擾因令海軍察等派出吉
林索倫官兵先行埋伏果有賊百餘分為三股來
犯砍木之兵伏兵齊起直前奮力攢射除殲斃外

餘多帶傷潰逸至十六日黎明成德營盤對山深
箐之旁遙見有騎馬兩賊往來知是誘敵之計先
派章谷哈達爾徒達擊穆克登阿等領兵繞越山
梁以截賊人後路成德即同侍衛伊布都司鄭起
榮等帶兵二百冲入箐林又見有賊二百餘名或
伏於大石倒樹之內或爬在大樹之上放箭拒賊
我兵正在擊殺中忽特成額六十六帶兵趕到賊
又見哈薩爾圖等領兵已上山梁與游生福殺泰

都司納寄善合兵下壓知係往斷其後紛紛奔走
我兵尾從追殺斃賊甚衆及賊奔至哈隆爾圖等
所到礮下我兵猶未及合圍而賊經過之地均係
鎗箭可及之處官兵從旁合力竭射復斃死十餘
名餘賊中鎗帶箭逃遁回礮此三次攻打共計殺
賊五六十人而其受傷竄去者更為不少查賊人
勢窮力竭尚敢肆其詭譎設伏引誘更為可恨但
非惟不能得意而因此轉多殲戮賊氣自必日形

消阻奏入

上諭軍機大臣曰此次官兵其不意殲賊五六十人其帶傷遁回者更為不少自足以碎其胆而褫其魄但現在夏至已逾半月向後晴霽必多阿桂當圖相時攻勦以期迅速奏功

同日阿桂豐昇額色布騰巴爾珠爾又奏言賊中雨電疾病情形詢之脫出各土兵及屯練漢兵等所見相同似非捏飾惟是因獸猶闢而此時相持日

久賊番別生詭計偷劫營卡抄截後路皆為事理所應有誠如

聖諭不可不防但此時既無小金川番人潛為內應夾
壩以來斷不能於要緊地方竟行佔據以肆其抄
截之謀即如前此巴木通帛噶爾角克碉滋擾之
處賊番實有男婦二三百人而該處官兵不過百
餘即將賊番擊退是其鬼蜮伎倆已無可施而臣
桂又令富勒渾常青旺保祿等相度形勢將河北

之零星營卡盡移設於河南當此水漲湍急之時
橋座既俱經折毀皮船又難渡急流似可無慮其
滋擾臣等仍密飭後路各提鎮小心防範務在肅
清其附近大營之營卡並嚴飭將弁等毋得稍存
疎懈其後路改設臺站事宜揆提督等議覆到者
詳悉俱奏臣查谷噶一路仰荷

聖明期望較有可進之機而衆議僉同亦無不以為
望況前此兩金川併其螳臂抗拒王師不及一年

尚將小金川即行殄滅今止有金川最爾一隅豈有不即埽除之理再以賊酋力量計之即使鉛藥米糧尚不至於竭廢而人數究屬無多今承

皇上賞給吉林索倫勁旅以來鎗箭所施殺賊刼寨不少臣阿桂十三年在金川及去年在資哩阿喀木雅均未見有殲戮如此者即去年臣阿桂在南路當噶爾拉山梁節次打仗頗有殺戮亦無如此之多賊衆只有此數日就死亡而大兵聲勢日增斷

不能久為支拒近因雨雪連綿尚多稽阻令時令
已交仲夏向後暢晴即可力攻深入以仰副

皇上期望至意奏入

上嘉之

平定兩金川方略卷九十六

欽定四庫全書

平定兩金川方略卷九十七

六月甲申桂林奏言准將軍阿桂札稱西南兩路
大兵後路奉

旨通盤籌畫其南路情形與臣公同商酌等情臣查阿

桂所稱科多一帶逼近賊境而僧格宗在山崖之
下甚屬受敵即賊亦不能拒守南路設駐兵丁應
從覺木覺爾宗起僧格宗之兵即移歸於該處而

科多日古嚕防兵均移駐於河南塔克撒榮寨達
實喜等處其自美諾至納木覺爾宗路逕改從河
南經由舍隆達實喜一帶行走布置始為周密此
時河漲溜急賊人諒難過河滋擾等語查僧格宗
一帶山勢險峻前橫大河我兵營卡不能瀕河布
設賊番憑高下瞰往往乘夜滾石放鎗我兵仰攻
未免不能得勢比來潛於夾壩漸覺日多焉知非
金川派來賊匪藉此出沒以窺我虛實似非盡係

窘蹙窮番只圖覓食况當噶爾拉一帶其形勢聳
出諸峯俯眺僧格宗等處瞭若指掌該處地居扼
要即如上年厚集多兵尚難得手倘併力突來肆
擾官軍限於地勢稍有挫失更屬不成事體今自
納木覺爾宗設駐起而以僧格宗至科多一路防
兵移駐河南佔據險要兼有大兵阻隔賊自無從
施其鬼域倘敢冒死前來則我兵居高臨下正可
痛加殲戮且河南之塔克撒達寶喜等處與河北

之科多納木覺爾宗僅係一河之隔望若咫尺今
一轉移間我兵已得地利賊番失所依憑自無他
慮又查南路自科多至僧格宗各處原共分安兵
七百名因地制宜應以二百名歸併於納木覺爾
宗以三百名分布於河南塔克撒營寨達實喜尚
餘二百名應添於阿布爾則一帶查阿布爾則為
防堵當噶爾拉一路要口最為喫緊今計納木覺
爾宗至阿布爾則中間有拉察喇嘛寺原安兵一

百名以通聲息但自喇嘛寺上至阿布爾則下至
納木覺爾宗相距尚遠應於適中之處各安兵一
百名以資聯絡而壯聲威臣現囑教成汪騰龍查
照前議分別上緊趕辦汪騰龍即在河北納木覺
爾宗一帶料理歸併添設各事並即親赴喇嘛寺
上下適中之處相度地勢山形將添安之兵妥為
布置其移駐河南之兵刻下河水洶湧難以濟渡
已令教成帶領由薩穆果穆過河自美諾轉至塔

克撒達實喜一帶查照安設再自納木覺爾宗至
章谷一帶後路延袤一百餘里其間分駐營盤共
有十餘處汪騰龍駐扎納木覺爾宗相機調度自
為得力並令侍衛哈青阿往來照料會商辦理奏
入

上諭軍機大臣曰桂林奏南路應在納木覺爾宗及塔
克撒營寨達實喜等處移兵防守並已囑令教成汪
騰龍上緊趕辦所辦甚好當河漲之時將我兵移駐

河南據其要害賊自無令潛出滋擾惟當嚴飭派出
防守之員督飭各兵認真守禦勿稍偷安疎懈又據
稱比來潛放夾壩漸覺日多焉知非金川派來賊匪
藉此出沒以窺我虛實似非盡係窘蹙窮番止圖覓
食者所為等語此見亦是但阿桂進勦得利若直抵
勒烏圍賊番自顧不暇并此必不敢於輕出此等夾
壩賊匪情節甚為可惡着將軍等留心於平定金川
後派兵搜捕勦洗盡淨勿使稍留餘孽

丁亥常青富興奏言四月十九日木波派兵護送公文險路遇賊損失兵丁奉將軍阿桂派令穆塔爾賡噶等帶領土兵前來助勦茲據穆塔爾稱十二日巳刻見美卧溝有賊四五十人行走即率土兵搜捕賊衆登山拒敵土兵抄其後路漢兵迎面力攻賊衆惶窘滾巖撲水死者甚多計殺賊二名生擒小頭目一名等語臣等現在詰訊確供解送大營辦理

同日明亮富德奏言查新調黔兵二千現俱過赴南路臣等酌令暫駐章谷且一切應辦事宜俱有成局第將大營部署稍畢即可發兵前往正地臣等公同商酌除與兆緯和諾德赫布扎爾桑書明阿雅蘭保英泰斐慎劉輝祖俱留絨布外其奎林三寶和隆武阿爾都珠爾格德富寧阿蘭保副都統舒景安總兵教成俱令隨赴正地其餘侍衛章京及將領備弁等官俱酌量分派兩路應用現於

二十一日將章谷新到之黔兵二千先令趕赴吉地而自大營調往之滿漢屯土各兵五千餘人亦即分起接續前進臣明亮於二十六日壓後起程自絨布前至正地程途遙遠且此月內雨水過多道路泥濘難行查吉地去正地尚二百餘里賊人無從窺探土都司丹津扎布並新調革布什咱土兵一千人在彼等候到日必須面為駕馭以得其心而用其力至於該處形勢所在亦必傳集土人

詳加訊問以便相機進兵更有把握萬一正地後
路叢雜賊番到處可以攔截臣明亮亦必步步審
量斷不可少有冒昧均奏入

上諭軍機大臣曰穆塔爾賡噶此次甚屬奮勉出力著
各賞緞一疋傳旨嘉獎其出力之土兵並著常青等
查明獎賞以示鼓勵至明亮奏現於五月二十六日
起身前赴正地其絨布寨軍營各處所有官兵一經
抽動賊人斷無不知恐見我兵數分開勢或單弱乘

隙潛來滋擾不可不力為殲戮其馬尼一帶後路尤當設法緊防此乃富德專責不宜稍懈如遇有應奏事件一面知會明亮一面即速專摺具奏

戊子富勒渾奏言前奉

諭旨所有改併防駐事宜着富勒渾常青悉心會籌查大板昭撒納一帶為西北軍營吃緊後路大板昭尤屬存貯軍糧軍火總匯之區山勢亘連路徑交錯屢蒙

皇上厯念飭臣嚴密巡防臣時刻留心詳詢番人并遣
派叅將劉輝祖等帶領弁兵分頭巡邏其中深溝
曲徑與賊相通之處甚多近日以來冰雪漸消
化更非冬春間可比益當加緊搜查且山深路雜
尤須熟諳屯練土兵協同漢兵前往方為穩妥現
准常青於後路滿兵內通融抽撥三百名臣復遵
奉

諭旨札商文綬於川省存營兵內酌量抽調二百名並

屯練土兵數十名分安大板昭撒納一帶以資巡防搜勦之用各兵業已陸續到來一面督飭將備等照舊仍由正路會哨巡查以靖地方一面另派勇幹將備帶領弁兵及屯練土兵等密赴逼近賊境各山梁溝口以及深林密箐實力搜查務使賊番聞風畏懼不敢試其鬼域暗來窺伺再大板昭與谷噶了口最為切近山後一帶尚有小路可出喇穆喇穆之南今我兵每日搜山往來出入既可

聞

與軍營前敵聲氣聯絡並使賊人不知我兵虛實
底裏自必分力防守似亦可稍牽其勢奏入報

庚寅阿桂豐昇額色布騰巴爾珠爾奏言五月十
八二十等日賊番疊來滋擾官兵均先設伏前往
衝殺殲斃頗多至二十夜烏什哈達帶領官兵接
駟柵座是處本為遜克爾宗屏蔽若被我兵搶佔
則遜克爾宗即難據守度賊人值此窘急更當悉

力前來侵擾因令海蘭察額森特帶兵防備福康
安等在後接應亥刻果有賊從林箐衝出烏什哈
達等併力追殺賊雖屢却尚以木植蔽身放鎗支
拒天近黎明額森特親帶吉林索倫及土兵冲殺
海蘭察亦縱兵從右衝下合勢攻擊弓箭愈近愈
無虛發賊人踉蹌奔竄官兵追殺直抵賊碕之下
此次殺賊更多負箭奔竄者尤衆又二十二日夜
戌刻有賊三四百名將遊擊福敏泰都司納奇善

等五卡圍住而把總楊遇春所守之第一木卡外賊人聚集尤多其成德營盤前面薩斯嘉赤溝內亦有賊人鎗礮明亮成德即派兵一百名令遊擊穆克登阿上色依谷山梁接應又率都司鄭起榮等前赴溝內設伏預備截殺敗遁以及應援之賊維時福敏泰納其善兩卡侵擾賊人本屬無多一經知覺放鎗滾石賊即敗遁隨各帶所領之兵分為兩翼下壓至楊遇春所守之卡見賊人蟻聚內

喊疑為是卡已失福敏泰等遂高聲傳號經楊遇春在卡內應聲因即施放連環鎗直下攻撲賊番紛紛敗遁官兵趁勢追殺直至箐邊而止查楊遇春木卡內只有官兵五十餘人而賊衆二三百人自二更攻起直至五更已將木卡砍開缺口並不能稍有動搖仍待應援兵至合力擊退則賊人伎倆已可槩見其溝內前來之賊亦經成德擊敗遁逃以此地形勢而論一得喇穆喇穆則遜克爾宗

固可必得而一得遜克爾宗則喇穆喇穆亦必不
攻自潰今已架起木卡十五座相拒賊人礮卡均
係鎗箭可及之地臣等現擬築起礮臺用礮轟摧
則賊人在前之三礮自可相機攻取一得三礮則
在後之二礮亦斷不能固守至此地尚有可以設
法繞進之處而滇兵三千業已全數到來現在詳
探道路情形趕緊籌辦再二十日夜賊人來擾新
架木柵瓦寺土都司楞真帶領土兵臨陣殺賊實

為奮勇該弁前已賞戴藍銅今臣等復行賞給花
銅以示鼓勵

同日阿桂豐昇額色布騰巴爾珠爾又奏言伏思
攻勦金川為時已久尚未能尅日埽犁臣等焦切
彌深寢食俱廢但此番自春入夏雨雪連綿者七
天特晴雨原為我與賊公共之事而此間攻守異
勢賊人於碉卡之內安坐據守不憂雨雪我兵攀
林踰石涉險衝泥勞逸迥異且雨中登涉所有火

藥火繩火箭一經沾濕即難應用所以於攻取之勢籌辦頗多費手其間有一半日晴霽屢次議定進攻仍又雨雪瀰漫終未得手此間進兵利於秋冬每不利於夏令今以時勢揆之賊人悉其力量全在此間堵禦而雨雪稽攻之際賊人於內一層險要地方增修碉卡而所籌計者又已移步換形必須踣探確切始可察間繞越現交夏至已後雖偶有一二日之晴而風雨仍不時間作臣等惟有

竭盡心力設法辦理至此次後路輒出賊人頗多而後路袤延幾至四五百里臣阿桂實亦鞭長莫及但後路各處今已將零星營卡酌量撤併賊更無從窺伺以擾軍心故近日以來轉於前敵左右偷劫營盤以逞其困獸猶鬪之計然賊於附近大營之處多一番滋擾即多一番勦殺轉望其多來以紓忿恨奏入

上諭軍機大臣曰阿桂等奏十八二十二等日俱

有賊衆潛來侵擾將弁等守禦嚴密賊不能犯並經
阿桂預先設伏因得堵截殲勦殺賊甚多等語賊人
此時尚敢為困獸之鬪經卡官兵實力抵擊均堪嘉
獎着阿桂等查明記其功績俟大功告成時一併咨
部優叙至遊擊福敏泰於本卡擊退賊人後復與都
司納奇善各帶兵分為兩翼下壓趕至把總楊遇春
卡邊高聲傳號經楊遇春在卡內應聲答號因即施
放連環鎗直下攻撲賊人敗遁官兵趁勢追殺直至

箐邊而止並稱楊遇春卡只有官兵五十餘賊衆二
三百人自二更攻至五更已將木卡砍開缺口不能
稍有動搖等語楊遇春竭力守卡賊不能動甚屬可
嘉而福敏泰於追賊之際奮勇應援亦足嘉獎現在
軍營正需勇幹將弁此等出力人員自宜亟加拔擢
以示鼓勵適阿桂奏到題陞各員內有叅將守備等
缺已降旨將福敏泰陞補叅將楊遇春起陞守備各
路將軍叅贊可將此諭知將領弁兵等俾其益知奮

勉至福敏泰同往帶兵追賊尚有都司納其善而放
鎗應援楊遇春木卡時止稱福敏泰等納其善是否
在內未經叙明着阿桂確查追賊援卡時若納其善
一體出力即將福敏泰所遺遊擊之缺令其陞補否
則照其勞績記檔俟功成一併議叙又奏稱瓦寺土
都司楞真帶領土兵臨陣殺賊實為出力奮勇即行
賞戴花翎等語所辦亦好土都司如此出力自當逾
格獎勵楞真著賞給叅將銜遇有叅將缺出即將楞

真奏補亦無不可並將此傳諭在營各土兵知悉俾
其益奮勉又另摺奏稱此次後路軼出賊人頗為不
少後路袤延幾四五百里實亦鞭長莫及等語科多
破碉巴木通各處現交富勒渾常青旺保祿等實力
分防而阿桂近日差往之穆塔爾等幫同搜勦甚為
出力惟在伊等防守弗疎巡查得法自可無虞滋事
該督提等當勉為之況昨經富勒渾奏抽調川省存
營兵二百名同屯土兵數十名分安大板昭撒納一

帶以資防勦是凡係緊要處所俱已派兵守禦辦理亦妥阿桂務須從長妥計迅奏膚功以膺茂賞

臣等謹按自勦金川將帥輸誠士卒用命原屬分所當然乃蒙

皇上曲加體恤所以激勵感發之者無微不至如楊遇春福敏泰等或據卡扞禦或領兵赴援雖擊退賊番微勞足錄究與摧礪掃穴有間而爵賞亟加恩施格外其同時帶兵之納其善摺內未及

奏明復蒙

聖慈注念核其是否一體出力並予起遷而土都司標
真奮勇殲賊即令拔授將佐所由

殊恩淪浹不特奮勉者愈矢蓋忱即庸駕者亦皆知所
觀感而振勵云

壬辰郝碩奏言查各站所設夫役其由各州縣辦
解赴站五月限滿換班者是為長夫其遇差務殷
繁一時人夫不敷應用於站上暫行雇募者謂之

客夫查期滿應換長夫其願回原籍者固屬不少而亦有仍留本站謀生充當客夫者臣思此項人夫供役既久道路熟悉運送一切必為得力與其聽彼留站充當客夫莫若將此項人夫於更換時逐一查詢如果願留站所即移知該州縣照常給發安家銀兩於本籍換班人夫數內照額扣除不特里民得免多雇之煩亦省沿途口糧之費而內地解換夫數既減到站更能迅速於公私實為兩便

奏入

上嘉之

丙申明亮奏言臣於前月二十六日自絨布起程
數日以來陰雨泥濘各兵俱係自負軍裝行走費
力因令緩程以資休息六月初一日始抵吉地土
都司丹津扎布率各頭人來見據稱由正地山口
進去前至黃草坪右手即通薩思得巴甲下與馬
爾邦相連但山勢極為險惡由黃草坪直下攻奪

正地去路尚遠且兩山箐林相夾逐段修列戰礮
亦非頃刻可破惟甲魯東去十餘里即是甲爾壟
壩翻山過去打通礮卡易見成功等語臣查革布
什咱地方林密山大此時雖未親臨賊境而甲魯
以前遙見山峯形勢大槩相同先已派令土目及
索倫吉林官兵前往偵探俟其回營將正地山口
及甲爾壟壩兩路山形地利確切周知始擇路進
勦

同日阿桂豐昇額色布騰巴爾珠爾奏言查前月二十二日等日兵接架木柵擬用礮位轟推遜克爾宗以為尅日攻撲之地當將鑄成礮位運赴礮臺推擊甚為得力二十七日大霧稍開打中賊人第三礮礮子穿礮而過此礮係賊收藏火藥之所火藥轟發則其礮立塌礮內賊衆已均轟斃其各處礮位亦時有擊斃賊人實為得力但目下天氣仍不時陰雨本月初一日且降大雪即有一半日

稍停而霧氣轉大官兵距賊雖近礮座亦不能見
是以雖經轟毀賊隨于雨霧中復加修整查此處
賊礮五座本尚可以繞圍第因坡礮陡削且兩邊
均係箐林又有賊卡應援攻勦不無費手臣等思
賊人狡獪異常竭其力量畢聚於此遜克爾宗之
賊既日加增喇穆喇穆之賊未嘗見少自應於此
二處一齊攻撲使賊不能揣我兵之所向臣等已
復趕鑄礮位設於別斯滿了口極力轟摧仍將兩

處派定之兵時刻預備一俟稍有摧殘不拘日夜
乘其未及修補之先立時攻打至日爾巴當噶從
未攻勦若能出其不意突前進據則五岱處官兵
亦可乘機攻壓合勢而下但該處大槩情形雖可
由羅博瓦一望而知而溝內箐林深黑其中路逕
曲折尚須詳審俟踴看明確時併力攻撲自不難
於得手再五月二十五日有四川提標兵丁賈國
正從底木達脫出詢係上年六月因從登春救援

底木達被賊拿去今乘賊人酒醉逃出又稱上年
見有旗人尼姓者原戴孔雀翎同在一處常說看
守甚嚴求死不得嗣于臘月間乘空投水身死等
語兵丁買國正係得傷被擒屢次冒死走脫應即
收伍留營差遣其所稱尼姓之人臣等詢其年貌
即係護軍叅領尼三泰上年九月間據賡噶供有
尼三泰被賊拿去衣裳破爛逃又不能逃出之語
今投水身死買國正既經目擊自無疑義均奏入

上諭軍機大臣曰明亮奏查看正地山口及甲爾壘壩
兩路擇其穩妥者相機進勦自當如此慎重又據阿
桂等奏用礮下擊賊碉一摺此實最好機會阿桂處
既得自高臨下之勢又有礮力相助可望有成又據
奏天氣仍不時陰雨且六月初一日尚然下雪雖番
地氣候異常亦不應乖舛若此似係賊人扎達所為
但扎達本非正道只須衆人不以為事法即不靈所
謂見怪不怪其怪自滅亦邪不勝正之定理也將軍

等當諭知營中將領弁兵使皆明於正理而不感於怪異其技自無所施至喇嘛噶爾瑪噶什前經明亮等奏於五月初六日前赴西路軍營念經距阿桂拜發此摺時已將一月該喇嘛曾否到營何以未見阿桂奏及前曾發往新造利益鈴杵一分令其看噶爾瑪噶什如道行果好並能實心出力即將鈴杵賞給阿桂接奉前旨必更留心察看噶爾瑪噶什若實係有道行之人則令其破賊番扎達邪法以止雨開霧

自非所難至買國正所供之署護軍叅領尼三泰為賊所遮乘空投水而死等語尚屬可憫已有旨交部照陣亡例減半賞恤矣

同日阿桂又奏言後路防兵應行歸併移改之處臣通盤籌核查美諾為南北適中之地自須重兵駐守以通兩路軍營消息而欲守美諾必須守美諾以前之思巴喇布二處此二處舊有防兵分駐今更將裁撤博羅克之兵併入思巴裁撤格斯底

之兵併入刺布則據守尤為得勢而大壩溝口及薩穆果穆橋又已分安卡座賊自不能前來滋擾其西路之巴木通帛噶爾角克礪破礪等處南路之科多等處均在河北逼近賊境應將分駐河北之兵悉改移於河南有大河以為之限而又當此盛夏水漲之時橋梁拆斷賊人雖有皮船並無內應必不敢如上年截流而渡自可絕其覬覦之端至僧格宗本在山崖之下賊人若據其巔憑高瞰

下滾石放鎗官兵即難支禦從前碉座完好之時
大兵一據納木覺爾宗賊尚即時逃竄此其形勢
已可槩見況現在碉座已毀官兵營卡瀕河布設
更屬不能得勢即糧運改由南路供支仍不免夾
壩滋事所有南路河北地方應從納木覺爾宗駐
起而以日古嚕默資溝科多一帶防兵移駐河南
分設於達實喜榮寨塔克撒舍隆等處其自南路
至美諾之大路亦改從河南往來叅將銜汪騰龍

即於納木覺爾宗駐扎至底木達河北之巴木通
帛噶爾角克礪木波一帶防兵移駐河南分設於
舍克噶至叨烏等處其自美諾至撒納之大路亦
改從河南鄂克什別斯滿達扎山來往並添兵於
達扎及斃烏二處以資接應提督常青仍于底木
達駐劄其撒納一處為揪砥糧運經由總口酌令
富興往駐惟布朗郭宗一處雖在河北而地當美
卧溝賊境未可議裁且現設官兵駐劄之處離橋

甚近而由橋以至底木達營盤亦不滿一里橋之
兩旁設有守橋礮座而底木達有兵八百餘名彼
此照應呼吸相通實可無虞此外附近美諾之明
郭宗附近撒納之科紐克等處均應照舊安設至
南路分撥所餘之兵歸入納木覺爾宗西路分撥
所餘之兵添入撒納以資搜勦但查南路應撒之
兵尚多今塔撒一處係小金川向渡之所而榮寨
達實喜亦與納木覺爾宗僧格宗相對應將策卜

丹沙木拉爾資等四處應裁應減之兵添入塔克
撒一百名共安兵三百名其餘仍令桂林等酌量
加增再自納木覺爾宗上至拉察喇嘛寺又自拉
察喇嘛寺上至阿木爾則前桂林等議於中間添
設二卡各安兵一百名但地方遼濶密邇當噶爾
拉賊碉官兵力弱勢分轉恐啓其窺伺已札致桂
林酌量歸併以資防禦所有應行安兵地方并飭
各提督等親往相度擇有水泉處所務令卡牆堅

厚溝濠深濶使賊無從侵擾并將各卡兵弁如何
哨望巡防之處悉心指示嚴飭遵行其接遞公文
往來會哨各事宜亦令該鎮提等公同酌議另行
核定奏入

上嘉之

己亥顏希深奏言查綽斯甲布一路各站存糧已
足供一月兵食其就卓克采一路轉發綽斯甲布
軍糧亦源源接續運供不致稍有缺誤至於後路

糧運臣遵

旨操練兵丁日資護運夜資巡防邇來夾壩亦頗斂跡
惟查覺木交一帶均係密箐深林賊番慣於履險
尤可借以藏身邇日天氣晴霽臣飭站員帶兵大
加砍伐凡附近賊碕有徑可通之處使無樹木遮
隔賊既難以容身而夫役所住棚房即將此項木
植周圍安柵即有賊人竊發夫役亦可藉以拒敵
其呀哨周叟等處有可仿此行之者亦飭令一體

辦理奏入

上嘉之

同日常青奏言

臣

因各處營卡尚未修理完竣恐

賊匪潛出窺伺是以於五月二十六日派三等待

衛穆塔爾賡噶土都司擦斯甲澤旺等帶土兵一

百前赴噶魯什尼後山及登春一帶搜捕並派貴

州兵一百隨同接應二十七日穆塔爾賡噶等帶

同土兵至登春地方斬獲首級三顆生擒一名訊


係金川人名拉爾甲跟隨頭人僧格爾結帶領七人來看路徑纔到登春就遇大兵圍殺其僧格爾結帶傷逃回奏入

上諭軍機大臣曰常青奏三等侍衛穆塔爾賡噶土都司察斯甲澤旺等帶領土兵前往登春等處搜捕擒殺賊人等語穆塔爾賡噶及土兵等前因拿獲賊目穆工阿庫魯曾經分別獎賞今復奮勇殲擒賊匪殊屬可嘉穆塔爾賡著再加恩賞緞二疋土都司察

斯甲澤旺各賞緞一疋其在事出力土兵並著常青
查明量加獎賞惟是此次派兵巡山原有貴州兵同
往及殺賊擒賊全係土兵出力貴州兵無一同者可
見綠營兵畏葸無用甚屬不堪常青等當於頒賞土
兵時傳集同往之貴州兵面為曉諭以爾等甘讓土
兵立功受賞身為內地兵丁轉不及土兵之得用顏
面安在令其轉相告述或可稍激其愧勵之心然常
青處所有俱係綠營兵丁其不及土兵尚無足怪若

各將軍叅贊等軍營俱有滿洲索倫兵在彼不但八
旂勇銳非綠營屯土等所能及即登山陟嶺我吉林
索倫人衆亦所慣為豈肯落土兵之後著傳諭將軍
叅贊等嗣後遇有攻勦險隘之處若派用土兵必派
滿洲索倫兵同往不宜專伏土兵向前出力土兵雖
蠢其於地勢利害攻勦難易未嘗不能料及若見每
次皆責以所難必且妄生竊議以將軍叅贊不愛惜
若輩軀命令其陷敵衝鋒甚或輕視我滿洲索倫兵

為無能私相非笑此尤大有關係即使尅期奏捷而
讓土兵獨占首功亦復成何事體該將軍叅贊等當
一面留心妥辦



平定兩金川方略卷九十七